

Izbori



Provođenje izbora je prvobitno došlo u fokus Misije OSCE-a u Bosni i Hercegovini (Misija) još u Daytonskom mirovnom sporazumu iz 1995. godine, prije nego što su relevantne nadležnosti prenesene na Centralnu izbornu komisiju Bosne i Hercegovine (CIK) 2002. godine. Od ove prekretnice, Misija nastavlja raditi na širim inicijativama vezanim za izbore. Vođena preporukama OSCE Ureda za demokratske institucije i ljudska prava (ODIHR) i Grupe država protiv korupcije Vijeća Evrope (GRECO), Misija podržava razvoj izmjena i dopuna izbornog zakonodavstva i zakonodavstva koje se odnosi na finansiranje političkih stranaka. Misija nastavlja pružati kontinuiranu podršku CIK-u BiH, relevantnim institucijama i organizacijama civilnog društva (OCD) u daljnjem usklađivanju zakonodavstva i prakse s obavezama OSCE-a i ključnim međunarodnim standardima, te podstiče punu provedbu relevantnih zakona i preporuka ODIHR-a.

Odnosi s ključnim političkim akterima u BiH su od presudne su važnosti za uspješnu provedbu političkih i programskih ciljeva Misije i ostaju na vrhu prioriteta Misije. Putem Odsjeka za političko djelovanje i izbore, Misija prati političke i druge relevantne aktivnosti u Bosni i Hercegovini i regiji, procjenjujući trendove koji bi mogli utjecati na političku/sigurnosnu situaciju i njihov utjecaj na provedbu mandata Misije. Ured pomaže u formuliranju odgovora Misije na složena, kontroverzna i osjetljiva politička i operativna pitanja te predvodi izvršavanje odgovarajućih aktivnosti.

Kroz redovne sastanke s ključnim političkim akterima i institucijama na državnom, entitetskom i lokalnom nivou, Misija održava i dalje unapređuje odnose s relevantnim partnerima u BiH.

Jačanje integriteta izbora u Bosni i Hercegovini

Misija pruža kontinuiranu podršku Centralnoj izbornoj komisiji Bosne i Hercegovine u jačanju integriteta i transparentnosti izbora i jačanju tehničkih kapaciteta izborne administracije.

Podrška Misije fokusira se na četiri ključna stuba:

- Izgradnja kapaciteta izborne administracije;
- Uvođenje izbornih tehnologija;
- Informisanje birača i podizanje svijesti javnosti;
- Jačanje institucija odgovornih za rješavanje izbornih sporova i sprječavanje i rješavanje izbornih prevara.

Kroz vanbudžetski projekat „Unapređenje integriteta izbornih procesa 2024. i 2026. godine u BiH u skladu s preporukama ODIHR-a i međunarodnim standardima“ (Projekat), koji se provodi uz podršku međunarodnih donatora, Misija i CIK BiH su postigli rezultate koji predstavljaju prekretnicu u unapređenju integriteta izbora.

Tokom 2024. i 2025. godine, Misija je podržala obuke za preko 500 članova općinskih izbornih komisija, preko 220 kontrolora izbornih rezultata i preko 4300 predsjednika i zamjenika predsjednika biračkih odbora. Misija je također podržala izradu priručnika za obuku općinskih izbornih komisija i biračkih odbora.

Po prvi put u Bosni i Hercegovini, kroz pilot projekat korištena je biometrijska verifikacija i identifikacija birača tokom lokalnih izbora 2024. godine, na svih 138 biračkih mjesta u Brčko distriktu BiH. Misija je organizirala sveobuhvatnu obuku za operatore biometrijskih uređaja i simulacije glasanja za građane, osiguravajući nesmetan i transparentan proces pilotiranja. Ova inicijativa predstavlja ključni korak ka uvođenju biometrijskih tehnologija na svim nivoima za Opće izbore 2026. godine, kao i veliko dostignuće u izgradnji kapaciteta CIK-a BiH i izborne administracije.

Uz podršku Vlade Ujedinjenog Kraljevstva, Misija je također pružila podršku CIK-u u nadogradnji IT aplikacija za online registraciju političkih subjekata, glasača koji glasaju putem pošte i izbornih posmatrača uoči izbora 2026. godine. Osim toga, Misija je podržala razvoj IT aplikacije za online regrutaciju članova biračkih odbora (BO). Ovi digitalni alati značajno smanjuju mogućnosti za izborne prevare, minimiziraju ljudske greške, smanjuju administrativne troškove i opterećenje poslom, te unapređuju ukupnu transparentnost izbornog procesa.

Nadovezujući se na preporuke ODIHR-a, Misija je nastavila svoj angažman u aktivnostima CIK-a BiH usmjerenim na informiranje birača, s ciljem njihove modernizacije te uvođenja sistematičnijeg i učinkovitijeg pristupa. Misija nastavlja podržavati napore CIK-a BiH u informiranju birača, uključujući mobilizaciju građana da glasaju, organiziranje medijskih kampanja, održavanje Dana otvorenih vrata CIK-a za birače koji prvi put glasaju i marginalizirane grupe te održavanje javnih debata među kandidatima političkih stranaka.

Još jedna važna komponenta projekta usmjerena je na podizanje svijesti u javnosti o izbornim prevarama, unapređenje koordinacije među tijelima nadležnim za rješavanje izbornih sporova i jačanje razumijevanja, prijavljivanja i procesuiranja izbornih krivičnih djela i prekršaja u Bosni i Hercegovini. Zajedno, ovi naponi doprinose kredibilnijem, transparentnijem i odgovornijem izbornom okruženju u zemlji.

Misija će nastaviti pružati podršku CIK-u, relevantnim institucijama i organizacijama civilnog društva u daljnjem usklađivanju zakonodavstva i prakse s obavezama OSCE-a i ključnim međunarodnim standardima te poticati punu provedbu relevantnih zakona i preporuka ODIHR-a.

Za više informacija
skenirajte QR kod.



Misija OSCE-a u Bosni i Hercegovini
Fra Anđela Zvizdovića 1, UNITIC Toranj A
71000 Sarajevo
Bosna i Hercegovina

Tel: +387 33 952 100
Fax: +387 33 442 479
press.ba@osce.org
www.osce.org/bih

Pratite Misiju OSCE-a u BiH

